

Per na periclitar las purschidas da la baselgia

La regenza refusa l'iniziativa davart la taglia da baselgia

■ (anr) **La regenza grischuna refusa l'iniziativa dal pievel chantunala «Main taglia per il mastergn». Ina perdita da questa taglia distgariass mo minimalmain las persunas giuridicas.**

Per omaduas baselgias chantunales incassescha il chantun Grischun da las persunas giuridicas (societads anonimas, ScRL e.u.v.) ina taglia da baselgia, q.v.d. ina taglia da cultus, sin la taglia sin il gudogn e sin il chapital. Ella vegn repartida a las baselgias chantunales en relaziun dals commembers (fin da l'onn 2012: 54,3 pertschient catolics e 45,7 pertschient reformads). L'onn passà ha la taglia da cultus importà circa otg milliuns francs. L'iniziativa «Main taglia per il mastergn» (iniziativa davart la taglia da baselgia) dals Giuvens liberals vul abolir la taglia da cultus da las persunas giuridicas. Ultra da quai na duai il chantun

betg pajar contribuziuns per finanziar il cultus da las baselgias e da las cumanzas religiusas. Venderdi passà han cusseglia governativa *Barbara Janom Steiner* e *Toni Hess*, il manader dal servetsch giuridic da l'administraziun da taglia, preschentà la posiziun da la regenza davart quest'iniziativa.

«Consequenzas gravantas per las baselgias»

L'aboliziun da la taglia da cultus avess sco ch'els han avertì consequenzas gravantas per las baselgias chantunales. Tar la baselgia chantunala reformada crudass davent circa in terz da las entradas, tar la baselgia chantunala catolica passa 90 pertschient. Sche l'iniziativa vegniss acceptada na pudess ins betg pli finanziar ina gronda part da las purschidas da la baselgia che sa chattan ordaifer il sectur

da cultus. I sa tracta qua d'incumbensas socialas, charitativas e culturalas che las baselgias adempleschan a favur da la generalitad. La regenza na vul betg cumprometter questas prestaziuns. Las consequenzas finzialas gravantas per las baselgias chantunales cuntrafeschessan ad ina distgaria mo marginala da las singulas persunas giuridicas. Ultra da quai è la gronda part dals mastergnants persunas cun activitad da gudogn independenta en la furma giuridica d'ina interpresa singula u d'ina interpresa da persunas (societad singula, societad collectiva u commanditara). Las persunas naturalas cun activitad da gudogn independenta n'èn dentant betg pertutgadas da l'iniziativa, cuntrari al text. Sche l'iniziativa vegniss acceptada, na las distgariass quai pia betg. D'aggiuntar èsi ch'il tribunal federal svizzer protegia l'incassament da la

taglia da baselgia da las persunas giuridicas e che la gronda part dals chantuns enconuscha ina tala taglia. La regenza propona or da quest motiv al cussegl grond

da recumandar al pievel da refusar l'iniziativa davart la taglia da baselgia. Il cussegl grond vegn a tractar l'iniziativa en la sessiun d'october 2013.

«L'effect fiss be marginal»

CUN BARBARA JANOM STEINER
HA DISCURRÌ FLURIN ANDRY / ANR

In dals arguments principals da la regenza è ch'ella na vuless betg periclitar las ovras charitativas e socialas da las duas baselgias chantunales. Da tge ovras e servetschs sa tracti concretamain tar la baselgia catolica e tar la baselgia reformada?

Barbara Janom Steiner: La baselgia catolica sustegna cun quests daners tranter auter 70 plaivs cun finanzas stgarsas. Ils rest da las entradas vegn duvrà per atgnas instituziuns, sco p. ex. per la lavur cun la giuventetgna, l'instrucziun da religiun, la cussegliaziun da lèt e famiglia, per la scol'auta teologica e, quai è il cas era tar la baselgia reformada, per la pastoraziun en ils ospitals, chasas da tgira e praschuns. Omaduas baselgias sustegnan era organizaziuns charitativas sco Caritas, adebar e Crusch blaua. La baselgia reformada impunda quests meds finzials enpli era per l'agid cunter la malsogna Sida, per la renovaziun d'edifizis istorics che vegnan nizzegiads publicamain, sco baselgias, chapellas, ed auter pli.

Na fissan las prestaziuns da las duas baselgias betg leziass ch'er il stadi, il chantun pudess sorprender?

Geabain, ma alura avess il chantun

era da las finanziar. Las baselgias surprendan natiralmain er incumbensas e levgeschan uschia la lavur dal stadi. Sch'ellas na feschessan betg pli quai, alura fiss il stadi che avess da surprender e finanziar questas leziass, forsa er a maun da novas taglias. Quellas prestaziuns sco p. ex. la pastoraziun en clinicas vegnan duvradas er en avegnir.

Probablmain era l'idea dals iniziants che sche las firmas na vessan betg da pajar questa taglia da baselgia pudessan ellas far dapli gudogn, cun la conseguenza ch'il chantun avess dapliiras entradas da taglia. Na pudessi nascher la critica ch'il chantun renunzia a quellas ulteriuras entradas a favur da las baselgias chantunales?

Ins sto vesair las relaziuns: Sch'ins vesa che 86 pertschient da las persunas giuridicas han da pajar 200 fin maximalmain 400 francs l'onn, e sch'ins vesa tge che vegn tut fatg cun questas impostas, alura vesan ins ch'il schligeriment per las persunas giuridicas, per il mastergn, fiss marginal. Quai nun avess in grond effect sin las impostas che nus avessan dapliiras entradas d'imposta. Quel effect fiss propi be marginal. Enpli èsi da resguardar che blers mastergnants nun èn gnanc organisads sco persunas giuridicas. Perquai nun è il privel da critica grond.



Cusseglia governativa Barbara Janom Steiner e Toni Hess che maina il servetsch giuridic da l'administraziun da taglia han explitgà la missiva.

FOTO F. ANDRY